

松

陵

文

獻

松陵文獻獻集卷十一

邑人潘檉章力田撰

人物志十一

高僧

宋

德一

德一吳江人建炎初爲金人所擒遁歸卓墓村結草  
菴以居暑月煮茗施行人人未之奇也旣卒其徒法  
才用火葬於烈燄中得其所持數珠人皆驚歎因名

其菴曰畱珠元洪喬祖撰碑記趙孟頫爲書之至今尚存

元

善如

本續燈存藁

善如字愚仲吳江人嗣法徑山端禪師言不妄發信筆而書出世蘇州開元寺道望烜赫退居葑門直指菴人稱之曰直指和尚將終呼門人訣別泊然而逝

祖瑛

本續燈

祖瑛號石室吳江陳氏子出家於邑之普向寺得法

徑山晦機禪師住明州隆教雪寶育王及杭之萬壽  
晚年得瘻痺疾造一龕曰木炤日坐其中不涉世事  
至正癸未三月見一衰衣婦人叩頭請師應身爲國  
王師曰吾不願生天王家逾十七日趺坐而化

原妙本行狀

原妙號高峯吳江徐氏子母夢僧乘舟投宿而孕襁  
褓卽喜趺坐十五出家叅斷橋倫令究生從何來死  
從何去脅不至席口體俱忘叅雪巖欽令看趙州無  
字每入室輒被痛棒一日覩五祖演和尚真讚有省

自是當機不讓久之欽問日間浩浩時作得主麼曰  
作得主睡夢中作得主麼曰作得主復問正睡着時  
無夢無想無見無聞主在甚處師無語入龍鬚苦叅  
五載因同宿僧推枕墮地作聲廓然大徹咸淳甲戌  
遷武康雙髻學徒雲集遁入西天目之師子巖巖拔  
地千仞峭石林立就石洞營小室如舟榜曰死關悉  
屏給侍被甕爲鎗併日一食弟子亦罕得見道價彌  
重學者多殊方異域梯山航海而來師設三關語驗  
之下語不契輒閉門弗接元貞乙未冬鳴鼓告衆訖

偈而逝塔全身於死關師行履孤高機峰險峻屹爲  
宗門砥柱其語錄盛行至今

明

弘道

本青烏志

弘道號竺隱吳江沈氏子少穎悟日記千言出家青  
墩之密印寺從魯山文法師遊淹通教典謁我菴和  
尚於天竺深得教觀權實之旨洪武初築室澄源溪  
上將終老焉尋奉旨箋註楞伽諸經頒行天下御製  
竺隱說賜之後與楚石琦同召入京爲僧錄司左善

世孝慈皇后崩岐陽王請作佛事於靈谷感神燈數  
千照耀林木奉詔爲征南將士設廣薦大駕親臨有  
靈光四燭祥雲冠山之應二十四年告老居長干坐  
臥小室修一行三昧明年秋跏趺而逝茶毘舍利無  
筭塔於天竺雙檜峰

古拙俊

本續燈

古拙俊禪師吳江人出家越州日鑄寺叅石屋琪及  
三衢懶牧得禪定工夫叩古梅三見三被棒歸里立  
限壁觀九年每三年燃一指歷燃三指忽大徹徑見

福林度法戰相契遂畱首衆年二十八衆推出世遁迹下山韜光巖壑三十餘年洪武間奉旨剃度千僧住繁昌之東廬山永樂中被旨住金陵天界寺遂終老焉

真正堂

以下三傳本同里先哲記及蒙菴藁

真正堂童稚辭親師事萬峰和尚慧性開明悟道甚早精修苦行惟日不足草衣木食處之裕如嘗刺指血寫經無疾端坐而化越三日徧體汗流茶毘復有舍利時咸異之其弟應了然同師講道篤志禪那齒

德俱茂視其兄有光焉

寶南琛

寶南琛貌古心清充養有道始爲沙彌徒步登雙徑  
禮愚菴禪師咨叩心要學成歸隱慧日懺院兼通儒  
書遊戲詞翰士類極稱許之至定惠虎丘教席掌蘇  
州僧綱規矩老成緇徒畏服姚少師廣孝與之深契  
未及領薦而終

壽無瑕

源古泉附

壽無瑕吳縣陳氏子乳哺不葷食年十二入洞庭西

山之福源寺師琅雪菴福源貲產甚厚雪菴卒無瑕  
悉委不取惟孜孜訪道參禪於萬峯之高弟持寶藏  
受經於天界左善世誠鷲峰學通內外宣德四年領  
薦住吳江報恩寺戒行卓然緇素向慕始有興復之  
規嗣是掌教者爲源古泉本西山大族戴氏淹貫儒  
釋闡揚宗旨名出無瑕之右正統六年嘗往長沙市  
木舟行險途檣竿有火光燭天者三人歎其誠感後  
五年建天王殿復產靈芝於是遠近尊信禪林改觀  
矣

智瑄見續燈

智瑄號寶峯本姓范氏父木匠也爲海舟慈禪師造塔院斧傷其足索酒飲之海舟曰傷足猶可設若去頭尚能飲否瑄聞有警遂求出家充火頭刻意叅究不覺火燒去眉面如刀割引鏡自照豁然大悟作偈呈海舟被印可出世金陵高峯成化八年無疾而逝

真可本塔銘

真可字達觀本姓沈氏其先自句容徙居吳江之灘缺生五歲不語有異僧過摩其頸曰此兒出家當爲

天人師言訖不見遂能語性雄毅貌偉不羣生不喜  
見婦人年十七仗劍將遠遊宿虎丘僧舍聞誦八十  
八佛名大喜晨解腰金設齋求剃度去而叅方聞僧  
誦張拙秀才偈大疑之頭面俱腫一日忽悟腫處頓  
消自是凌轢諸方過匡廬窮相宗奧義叅徧融於京  
師掩關淞江復居興楞嚴寺募刻藏經易梵本爲方  
冊天下便之近五臺峩眉諸名山修復巨刹十五  
所所至繡書人稱紫柏大師慈聖皇太后聞其名  
賜紫伽黎神宗皇帝遣中涓致問焉師勇於救護不

惜軀命嘗歎曰慈山遣戌不歸我出世一大負礦稅  
不止我救世一大負傳燈未續我慧命一大負遂自  
匡廬復入京師妖書事起誣奏及師逮下詔獄榜掠  
狼藉猶與同繫者從容說法如平時一日索浴說偈  
端坐而逝待命六日顏色不變還葬徑山肉身儼然  
慈山作塔銘謂師見地直捷穩密不忝轉輪真子面  
目嚴冷接人不用世情悲願利生弘護三寶是名應  
身大士云有紫柏集十五卷行於世

性冲

本續燈

性冲字古湛秀水張氏子初以俗士見無趣空禪師有所契遂棄家剃染尋受付囑結茅徑山開法吳江之車溪菴提唱真切道風遠聞菴居二十餘載萬曆庚戌應徑山祖庭之請疾作仍返車溪終焉

通問本行狀

通問字箬菴父俞安期見文學傳安期晚年無子設百日無遮大會而師生弱冠穎異能文偶閱楞嚴有疑謁磬山修禪師矢志叅究將婚脫走武林落髮南澗之理安寺叅密雲於金粟不契仍上磬山夜聞風

聲有省益加精研洞明宗要出世南澗移住夾山金  
山繼主磬山祖席復應嘉禾漏澤之請凡五坐道場  
說法如雷宗風大振乙未秋預知死期散衣裝圖書  
與檀護訣別泊舟吳江之應天寺沐浴更衣而逝師  
體甚羸弱而神觀精明條令嚴肅衲子多望崖而返  
惟真叅實究者依焉至今稱南澗門風清嚴孤冷諸  
方莫及自五燈會元後四百餘年無編纂者師乃徧  
搜諸宗師語錄舉要芟繁爲續燈存藁十二卷禪林  
服其精當

通賢本塔銘

通賢字浮石平湖趙氏子生不茹葷將婚逃於普陀落髮焉歷叩真寂雲門懵無入路乃偕同志上鷹窠山頂掩死關聞舉屍在這裏其人何在有省得法天童悟和尚爲末後囑付弟子出世吳江遜村之報恩寺寺有三石佛自海上浮來其額曰古佛重光師俗名重光法號浮石如識記焉繼席天童歷應廣慧福城之請爲人樸實慈和與物無競學者樂親依之稱嗣法者最衆竟終老於遜村

道術

宋

陳昉

陳昉縣市人慶曆間爲縣吏掌刑名以廉謹惠愛稱無妻子惟蓄一婢性嗜魚每食必以二魚爲餉一日餉至而昉適他出同舍吏戲竊其一置舍席上昉歸以爲婢所匿也怒責之時向暑舍蓆生蛆墜几上昉視之乃魚腐也始悟婢寃歎曰此小事尚然况吾爲吏決大事能無寃耶遂辭役作詩詩云二十餘年作吏人後園花木池

成林盡是筆頭那撲得枝枝葉葉有冤聲刑重惟恐  
囚人怨情輕又怕本官嗔不如無事早歸去免得生  
竟對死鬼別親友從縣前運河洞中而去洞甚深相傳通

太湖之底上聞浪聲行七十里可出洞庭山後數年  
有道人沽飲肆中將別留一壺爲贈曰以此償酒價  
貯酒當佳旣去忽見酒旗上題云昔年陳昉登仙處  
酒味松陵第一家主人驚異取壺貯酒則香美異常  
自是沽者羣集家遂致富始知昉已仙矣因名其洞  
曰仙人洞洞上有橋曰仙里橋云明嘉靖間知縣張  
明道作亭其旁曰仙跡亭按真仙傳亦載昉事謂其

放魚得報於長橋踏白石上昇郡志因之益誕妄不

足信

元

富恕

富恕字子微號林屋山人宋丞相弼裔孫南渡來吳幼習舉子業值元季兵亂遂棄家爲昭靈觀道士然好學不倦善歌詩有名搢紳間嘗別築室雪灘之濱題曰掛蓑亭又繪仙山訪隱圖一卷寄興雲海之上遂昌鄭元祐爲記亟稱其人云同時有膺擇中瑛石

室皆吳江名僧恕與往還唱和爲方外交

雲外道者

雲外道者术真氏名靈保字佑之王逢梧溪集曰予過吳江同里洞真觀黃碧巖丹房會雲外道者曰嘗爲鎮南王長史統騎兵五百人征汝蔡妖黨以功聞賜金幣上尊陞司馬至正十六年二月長槍軍帥大小張鑑叛據揚州王退駐淮安時憲使褚不花拒寇趙負城胡陳寨首鼠兩間靈保說胡誘獲趙人畜千百計旣饑軍民相食數求老張平章援不爲應復將

王命間道走京師告危急狀授濟南路治中議督諸  
部救十月城陷不花拒敵死王被執逾月不屈妃某  
偕水死焉靈保得王凶問由海趨浙遂寄跡老氏蓋  
數年矣與之交旬日意氣殆欲相從於閨風之上者  
因壯其前高其後序而詩曰菲衣麻屨今道者元是  
親王右司馬雪尾羔羊蒸瓠肥金盤露酒明河瀉主  
畫才優彤邸間督戰功收霍丘下濟南別駕本遙授  
誓欲勤王膏草野先時張鑒叛揚州孤軍退在籌邊  
樓老張平章擁精銳間道蠟書躬遠投近郊雖順等

狼子千里橫亘長淮鮚鵠形徒志牛後爇龍種竟逐  
鴟夷浮申胥血淚霽雲鋏落景荒寒影悽獨去燕留  
吳百眺胸蘇臺又復遊麋鹿三萬頃湖七十峰一筇  
一篷娛老足胎禽將雛桐白華遇我黃石仙翁家蔬  
珠真經口暗誦滿月澹暉天東霞來者玩迅電往者  
歎逝水擬招安期生更拉偓佺子闌風共揖長爪姑  
試問蓬萊清淺還有幾

明

胡道安

胡道安字安谷性狂慙人呼胡風子爲玄妙觀道士  
師計玄老晚遇異人授青城太乙雷書及斬勘魃魔  
秘旨洪武末吳中秋旱知府延道安致禱道安登壇  
醉酒詬罵怒髮衝冠令下陰雲四合雷雨大作知府  
甚敬禮之

楊茂林

楊茂林字湛然有道行不用符檄書片紙能役神鬼  
永樂五年文皇后崩大集黃冠修醮事資冥福茂林  
以白衣見上異之命以官不受賜法衣俾遊四方會

吳江大旱署縣事王懋本延之禱雨雨隨澍因留之  
崇真道院構方丈以居在院屢著靈異一日忽蛻裘  
履而逝蓋百餘歲云後有自洞庭還者遇茂林授以  
二履令攜歸人始知其僊去

鄧青陽

以下二人本同里先哲記

鄧青陽全真道士也金丹內煉之功既成雲遊物外  
自武當往武夷因過同里隱者范伯彰延之家塾聽  
講神清氣肅見者竦然嘗著觀物吟百篇皆託物以  
喻性理之旨後數年尸解而去

俞嗣宗

俞嗣宗字廷遠儀表修長音吐洪暢傳靈寶齋法默契其妙醮筵歲事終日無惰容其誠敬類如此久居仁濟道院閩郡知名年九十有六

藝能

明

馬孜

馬孜字彥強善書洪武中嘗受薦不仕

盛寅

弟宏子儀從子倫

盛寅字啓東以字行逮之子少學於王山人賓察脈處方有奇效永樂間有內侍以蠱斥居外久之上望見驚曰而固在耶對以寅實生之得召見授御醫太子妃孕而疾動寅謂當與利藥諸醫皆駭阻妃聞令

吉利藥者進治立愈大被賞寅在上前持論梗梗以此愈重之扈從北征洪熙初掌太醫院賜勅褒美宣德中嘗應制賦瑞雪詩一日與同官奕於御藥房上猝至不及屏因叩頭請罪上覽局咨賞令賦觀奕詩明日御製醉太平詞以賜其家至今傳之寅節操不苟嘗夢有寄胡椒者私啓之覺而踧踖遂至累日巡撫周忱與道故舊餉餘糧米百斛寅以詩却之忱服其高致臨卒作詩三章年六十七所著有流光集弟宏子僎從子倫俱以醫顯故盛氏世世隸太醫籍云

先賢讚有命啓東視黑白猿疾事  
類戲蝶不根且他書不載故削之

宏字叔大亦爲御醫與寅齊名景泰初治宮妃疾良  
效當進官不拜以家世隸軍伍請除之報可尋致仕  
僕字汝德勤學有行誼寅教之曰醫貴有德顯則出  
入禁密微亦往來閨闥不可不慎也僕謹受命父卒  
醫遂大顯不以貧富二其心教弟孩成進士嘗使家  
僅輸糧於官多取一籌以歸僕怒責之置米屋後以  
飼鳥雀其立志如此從子皧徐志作愷字用美早年應  
舉不偶遂更業醫精其術存心仁厚士大夫皆禮重

之成化初召入太醫院將擢用以母老告歸久之自  
撰墓誌而卒年七十五子乾亦善爲方有父風  
倫字文敘性明敏少傳寅學又遇異人授堪輿家言  
尤精其術人以疾求療及相地者殆無虛日

盛伯瑄

以下三人出同里先哲記及歸田藁

盛伯瑄其先揚州人隨父宦遊華亭會中原道梗徙  
居同里性耿介寡與勤於問學爲詩務出已意不喜  
與人賡酬善以予平之術推人貴賤貧富壽夭累著  
奇驗安貧樂道壽終於家獨行之士也二子謫戌南

荒以歿遂無後

糜仲康

糜仲康於醫甚深內經諸書唐宋以來名家之所論辨皆能鉤摘幽隱切脉治病有十全之效然不汲汲於利故鄉人尤德之子宗伯能詩章善墨梅醫術益顯

周孟堅

周孟堅世以醫名同里迫孟堅尤精其術所試輒效知縣王廸雅重其爲人名其堂曰恒心成化中入太

醫院後歸自京師聲譽益振人有求者隨扣輒應不以終始易節縉紳皆折節下之同時又有蔣士能善瘍醫亦世業也

陸復

陸復字明本善畫梅自號梅花主人嘗至金陵用黃紙題門自鬻魏國公出見之訝其儕妄執之復謝曰愚民不識禁忌因問何能對曰能寫梅耳命畫於粉壁高數仞復染翰操管頃刻而成公大喜貰之更加禮焉由是名重兩京

鄒明

鄒明字啓東善傳真得意時絲髮無不肖者

沈與齡

沈與齡明醫不爲危言高論而所治十不失二三遠近神之稱爲竹亭先生有醫便行世

周叔宗

周叔宗名祖以字行用之孫好禪理工真草書自言得晉人法有高韻嘗至京師名大噪時人求其泥金書者一字一金同時有顧澄先者字慧曉工歐陽書

卷十一  
體嘗放叔宗筆意往往酷肖而氣骨不如識者以此  
別其真贗

張金

張金字德純以字行居梅里有花木之勝以畫猫自  
給人或買縣堂中真猫見而怒與之鬪名遂重知縣  
劉時俊高其行嘗屏騶從造其門短几山肴相對移

畧

皇甫焯

皇甫焯字文含叅政渙孫博學能文旁究六壬遁甲

之術崇禎十年以明經對策京師有試其術者扣以  
日中休咎焯占之曰今日主馬驚其人晒曰吾此馬  
服之二十年騁高凌阻如履康莊何至罹駕爲哉將  
歸謂馭者曰善控之毋爲皇甫先生笑也行未二里  
馬遇橐駝駭而奔其人僅免心服焯之奇中自此知  
名京師

黃宸

黃宸自稱長嘯生善山水花鳥兼長八分書性嶽嶽  
不喜附麗有隱者風從子鳴鳳亦善寫生

潘子曰余聞之自嘉隆以來縉紳先生風流弘長類  
多兼能如周公用顧公大典竝擅丹青而曹公鍊薛  
公穆爲之亞王公問汝公泰竝工書法而朱公應辰  
凌公信爲之繼以至吳公涵善篆沈公璟善四聲珣  
善隸此數君子者文章政事表表耳目皆不以一藝  
名故無得而贊焉然亦足見一時文雅之盛云

松陵文獻獻集卷十二

邑人潘稦章力田撰

人物志十二

列女

宋

張二娘

張二娘湖州人嫁邑民陳熙載年二十而寡

徐志云  
二十三

父母憐其無子欲奪之不從以夫從子煥文爲後事  
舅姑無失禮年八十餘元大德三年旌其門

元

獨吉氏

獨吉氏斷事甯六舍妻也夫亡守節不嫁至順二年  
被旌

明

阮妙瞻

阮妙瞻郡人時卿女嫁劉彥敬年二十五而寡子真  
裁五歲且姑已老妙瞻竭力奉養訓子讀書仕至河  
間府通判鄉人榮之洪武十年旌表

楊六娘

楊六娘查華二妻也年十七而嫁有娠未產而夫卒及生子名勝十躬自教育以承宗祀洪武十九年旌表

按實錄洪武二十年夏四月吳江民劉某妻阮氏查某妻楊氏皆年少夫亡不改其節詔旌表其門據此則二婦同在二十年旌表而舊志一以爲十年一以爲十九年未知孰是姑從原文

錢氏

錢氏太倉人嫁同里胡原洪武三十年原戍雲南逃還事覺坐棄市錢曰君萬里歸爲妾耳今君死妾何忍獨生至夜分抱乳下兒泣曰吾不能保汝矣遂自縊年二十八袁華爲傳

陸氏

陸氏吳江民王永年妻年少喪夫育孤有方守節無玷正統七年三月旌其門見英宗實錄莫徐二志皆不載

凌淑貞

凌淑貞太常少卿信之女兒也歸同邑范忠忠早死  
淑貞守節不渝天順五年三月旌其門

張福真

張福真湖墓邨小家女也嫁黃偉偉父茂故爲許氏  
奴居城西賣漿偉死茂貧且鰥福真度難與居遂歸  
父母家父母強之他適自知不免佯許諾擇日當行  
乃粧飾衣常服密自經死時弘治五年十一月十六  
日也年二十五知縣金洪聞之欲爲奏聞而里老懼  
爲累不以實報遂止

事見莫旦續志較徐志所書頗爲詳覈蓋福真實  
以舅家貧且鰥無所依故不得已而歸父母家志  
不見諒遂以死繼之耳而徐志云茂將嫁之又云  
沐浴更衣辭其舅姑而出不知奪其志者乃父母  
非茂也而茂已鰥居又安得所謂姑而辭之紀載  
失實如此不可不辯

王氏

王氏少孤事大父繼宗盡孝贅趙維爲婿年二十而  
維死繼宗欲更嫁之不從携二女以居躬紡績以養

大父如是者三十餘年有司以聞弘治十二年旌其門

沈氏

沈氏知縣愚女弟也歸吳嵩嵩溺死無嗣竟不他適正德十三年被旌

顧氏

顧氏歸龐榮榮病瘵十年而卒顧哭之哀遂至失明父寬家故豐欲迎養之不從曰兒雖大人遺體然有家在不可畱也事姑能盡孝鄉里稱之正德十六年

旌其門見實錄徐志云嘉靖三年誤也

陸潔

陸潔許謨妻也年十八而嫁二十謨亡潔卽斷髮破面示不二志奉老姑撫稚子人無間言嘉靖十一年旌表卒年八十八

錢如潔

附沈氏

本杜偉墓誌

錢如潔父皓世爲儒林里著姓少字按察僉事曹鑑長子糖糖有痼疾不能娶自願解盟皓不聽鑑乃先娶小家沈氏女與糖居以試之糖終不知人道於是

又申前請皓從之如潔微聞卽欲自經母防守不得  
死稱病不食母強之如潔曰獨不聞蔡人之妻宋人  
之女故事乎母以爲然乃始食常晏居淡念偶見侍  
者棄敝衣於地呵之曰衣敝也而棄之假令而夫病  
也亦將棄之乎父母知其意防守益密而潛以女更  
許烏程溫氏如潔聞之復不食母慰諭三晝夜乃稍  
蔬食自度求死不得乃佯爲歡笑如平時守者稍懈  
將行之夕沐浴更衣大書寢壁遂東向自經死以曹  
氏所居近東也時年二十六後二年塘卒沈氏年尚

少姑董氏憐欲嫁之沈氏泣曰錢母未歸也猶能捐生以殉而妾旣歸矣又誰歸哉自是屏居一室足不踰閨嘉靖四十五年巡按御史溫如璋以沈氏貞節聞詔表其門獨不及如潔以世宗年高方祈天永命諱言死故遺之也沈氏謂錢母正適未蒙旌典讓不敢先至萬曆二年乃卒年八十有五嗣子大武請於錢氏迎如潔柩以歸遂合葬焉邑人稱曰雙烈

徐志書雙烈事多未覈今以吳中往哲記及墓誌叅定之徐志云塘卒溫氏來迎女知不免乃屏人

閨戶沐浴更衣書於寢壁云前緣已定禍福同當  
遂自經死遺書與其姑董求葬曹氏墓從之按錢  
女之卒在正德癸酉禩卒在後二年乙亥而謂禩  
卒於溫氏來迎之前不知曹氏已解盟矣固不必  
待其卒而始議他適也書壁之詞凡十四字卽居  
恒自念只有一船搖兩櫓何曾一女嫁雙夫兩語  
耳徐志云云不知何據至於合葬之事成於萬曆  
甲戌嗣子大武之謀距錢氏之卒已六十餘年而  
謂女自請之其姑從之不亦疎乎噫卽此一事已

不勝抵牾可見史事之難卽讀史者亦未易也

黃氏

黃氏凌士奎妻士奎沒黃氏年僅二十一有遺腹孤  
曰安親鞠之以至成立守節終身

費氏

費氏父庸年十八適郁瓚期年瓚卒無子矢心守節  
剪髮自誓已而脫簪珥營葬具因爲壽藏以俟曰我  
未亡人也孀居三十五載人無間言嘉靖三十八年

旌表

沈氏 本周道登撰傳

沈氏憲副啓曾孫女也年十八歸王子遠未踰歲子遠卒無嗣家貧依母以居沈氏哭曰所以不卽從王生地下者欲求一胤子以繼蒸嘗倘四十無後是天也吾竟下殉王生矣已而子遠弟孔章舉子洪祉沈氏適四十遂以爲子遠後子遠屬續時以短幅作書遺甥凝之沈氏得而帛囊之以自佩曰此王生書也覽之輒泣下垂四十年而以帛囊泣授洪祉曰此爾父書也平生足不踰闈言不出閫巡按饒公以其節

聞於朝加旌異焉

沈氏

沈氏諸生周甸妻夫早亡守志不貳萬曆三十年旌表

姜氏

姜氏姜誠之女年十九適吳會會故韭溪舊族遷長洲之葑溪善丹青姜氏歸會僅半載而會與其父及大父母相繼染疫死姜氏奉姑朱氏誓以死守家貧甚日勤紡績以供饋粥先是會娶婦時曾貸其友白

金三兩會歿友欲取償因說其姑令姜氏改適姑猶豫未決姜氏遂慨然入內寢自經死後事聞表門建祠詳見長洲志

凌貞女

本朱陸宣撰傳

凌貞女同里人字里中徐生應化未娶而夭貞女聞之泣請於父母欲往臨其喪不許則撫膺曰兒徐婦也父母禁兒行將何以爲兒有死而已父母不得已強聽一往貞女往卽易衰絰伏尸哭極哀水漿不入口者數日保姆乘間趣貞女歸貞女曰此吾家也又

安歸耶是時徐氏內外無不驚異貞女然以其年方少不欲畱之而貞女則堅欲畱誓不復去久之其舅死姑獨與貞女居又不能給薪蔬貞女益務操作以供養姑歲大祲斗米至二百錢而貞女以其力作所得更市美好以進姑爲感泣姑嘗疾困貞女剗股肉以啖之姑失明貞女屢舐其目已遂豁然人以爲孝感嘗立從子爲嗣竟不祿及姑卒并舉其舅與應化之喪皆貞女以一身任之自童年歸徐以迄於老飲食臥起必依徐郎柩哀感閭里巡按御史以其狀聞

詔旌其門歲給粟帛終身

沈氏本陳宗之傳畧

沈氏吳江人從父徙吳適黃居堂家壁立工丹青年二十四居堂死歟畢卽投繯居堂兄覺之泣曰弟無後而有遺孕倘生男弟不死矣沈氏拭淚從之屏處一室椎髻垢面日勤刺繡或臨夫畫冊粥斗粟自給後果生子元吉稍長卽課之讀篝燈縷續每隆冬單衣膚肉皴瘃至夜分欲寐引針自刺其臂年餘五十父患瞽無子獨棲臯峰山沈氏曰非我奉養不能全

父餘年矣乃歸父茅舍親刈草春米以供朝夕崇禎十年提學御史疏其節孝詔旌表

何氏

何氏邑民湯敏妻守節四十七年崇禎十年巡按御史以聞詔旌表

周氏

周氏四都人父早卒育於伯父諸生行簡年十二字邑人顧士彥未及婚而士彥患蠱奉侍湯藥者四年士彥竟卒周氏事翁姑以孝謹聞翁姑憐其年少謀

令更適周氏覺之乃剪髮毀容以絕其意萬曆三十九年知縣魏士前高其節爲加笄表門後翁姑沒含歟如禮尋卽所居以葬顧其地接吳氏祠堂所以誘脅改葬者萬端周氏不得已乃聽遷而身依族子以老年七十餘乃卒論者謂周氏固女也而全乎其爲婦且全乎其爲子養生送死始終一節嗚呼難矣

潘子曰傳列女者所以愧夫男子而二其行者也然而苦節幽光考見爲難莫志所載非旌表者不與近於隘矣且旌表者類有力者得之匹婦慕義將何所

勸焉徐志蒐採加詳然亦不數數見也以余所睹記往往家傳伯姬之操人表少君之行雖未能盡書然足以風矣至於乙酉以後海宇版蕩士大夫往往偷生蒙面而紅女田姬乃能駢頸連臂視死如歸一邑之中後先相望何其盛也余友戴笠業已彙錄爲一書而余采其尤者綴於篇

張氏

附張氏程氏

張氏諸生沈承銘妻乙酉十月十三日賊至盛澤被執張氏自紉其衣賊欲解之以刃自刎死同日遇害

者有張敬宇女盛澤人也字於邵賊焚其家挾女出女奪刀自剗其面賊怒殺之又有徽州民程振華女寓盛澤賊欲汚之不從赴火死

顧氏

顧氏諸生顧而雅女同里人歸於陳乙酉八月二十一日賊至殺其夫復逼之且哭且罵見殺於野

許氏徐氏顧氏沈氏

許氏太學生馬孟翔妻徐氏民徐華字女顧氏民顧玉洲孫女年十五皆同里人也賊至俱赴水死又同

里諸生沈襲嘗女爲賊所獲斷臂而死

張氏

附邵七妻

張氏滸墅關人吳江諸生陳偉妻丙戌正月十五日吳勝兆兵入城被執給守者投寶帶橋下死後月餘求得葬之貌如生邑中人士多爲詩文以弔焉同時有邵七妻居西門外被掠至寶帶橋亦赴水死

張氏

張氏諸生顧應鼎妾賊逼污之哭詈不屈遂要斬焉  
顧詵妻

附陳氏吳氏

諸生顧詭妻某氏遇賊不辱赴河死又有陳氏者諸  
生陳若來女年十七賊至投水賊救起氣未絕少選  
復投水死吳氏者亦儒家女遇賊赴河挽之出卽抱  
樹不可解被殺

徐氏附翁妻

徐氏與夫程某同避賊夫以金數兩授徐氏獨前遇  
賊見殺徐氏曰夫若懷金可以免死我何忍獨生亦  
赴水死時有翁其妻舟行遇賊先殺其夫將污之妻  
曰殺吾夫卽吾讐也奮罵不已遂被殺

木  
附  
沈氏  
附邵一妻

沈氏諸生陳啓瀛妻貌美而賢事翁姑以孝聞乙酉七月兵入同里啓瀛以全髮梟於市沈氏偕子女匿竹林中兵搜得攜其子女去復欲執沈氏沈氏倚竹誓死不肯去兵怒斫其臂遂仆地死而一手猶握竹節堅不可脫人咸異之邵一妻某氏貌頗美被執至舟中怡然如常兵不爲備至寶帶橋投水死

陳五媳

民陳五媳某氏黃家溪西木橋人年二十賊害其夫

因逼之某氏僞許焉挾以登舟伺間跳水死

徽商二婦

徽商某妻妾二人避難吳江洋雅港遇賊妻自溺妾被獲不從痛罵受三刃而絕

徐氏

金武襄澤沈仲衡妻乙酉兵至匿屋壁中火發出投社廟一卒露刃脅之抱柱不行強牽以去經白漾自投於水卒復出之驅令登舟大罵觸石卒怒刃之被七創而死

補遺

顧氏

顧氏光祿監事絅之女歸吳邦栻僅歲餘邦栻卒業太學病沒顧年二十四誓不改適事孀姑以孝聞嘉靖四十年旌表

寓賢

志有寓賢蓋人物之別見者也邑當吳越之衝素擅江湖之勝故停車問津者往往而有然或游而非寓則例不得書或寓而非賢又不必書也徐志列陸龜蒙范成大於寓賢中余旣據史傳駁正之矣若黃由姚廣孝皆以同郡之人名之曰寓夫壤地相接過從往來何所不有若必一一借書繁複已甚且余作是書雖托始一邑將藉爲三吳之權輿若彼此互用亦何用此駢枝爲耶故謹而削之非敢略也

宋

方滋

方滋字務德少寓應天寺建炎間歷浙西提舉司幹  
官乾道中知紹興平江二府

元

楊維楨

楊維楨字廉夫會稽人泰定中舉進士官至待制至  
正中避兵華嚴寺尋徙松江築玄圃蓬臺海內文士  
造門納屢殆無虛日自號鐵崖旣得鐵笛號鐵笛道

人洪武三年召修禮樂書維楨賦老客婦詞以進上  
喻其意賜安車詣闕畱百餘日書畢卽乞骸骨命仍  
以安車送之抵家而卒年七十五維楨天才逸邁所  
著詩文爲學者所宗號曰鐵體邑人陶振謝常輩皆  
其門生云

錢惟善

錢惟善字思復錢塘人至正辛巳鄉試出羅刹江賦  
鎮院三千人皆不知錢塘江爲曲江維善據枚乘七  
發引用因此得名遂號曲江居士官至副提舉張氏

據吳遂不仕退居吳江同里與楊維楨倡和有句云  
笠澤水寒魚尾赤洞庭霜落樹頭紅又云漢史丁公  
那及齒陶詩甲子不書年蓋感時事也已而移居華  
亭洪武初卒與維楨及陸居仁同葬于山號三高士  
墓

倪瓚

倪瓚字元鎮無錫人詩畫清絕爲世所重至正間避  
兵邑中寓同里及華嚴寺士大夫爭延致之見俗子  
輒避去不顧張昶人物志云瓚元季鬻田百千緡悉

與張伯雨晚年扁舟江湖多依止僧房道館寓松陵  
與陸靜遠虞勝伯爲友靜遠子願其子壻也時崑山  
顧瑛亦棄家隱同里僧寺故江陰王逢懷瑛詩有九  
里水雲孤櫂泊半樓霜月兩尊同之語

明

丁敏

丁敏字巽學本烏程人詩文典雅元末徙居吳山之  
麓與里人袁散張壽輩相唱和繞屋皆植梅常笑傲  
其下有詩集傳焉

董遠

董遠字仁仲天台人少以遠大自期不事家人生產  
精朱氏詩兼通左氏春秋至正中兩試有司不中遂  
畱錢塘潛心古學不復以科舉爲意已而入吳止天  
平山復寓松陵之梅花莊張士誠聞遠名遣使奉書  
幣迎之遠受書返幣堅臥不起使及門者再乃避地  
錦峰依浮圖氏以居吳元年徵赴京師以沉嘿不稱  
旨謫居濠梁八年以薦授莆田知縣時年六十餘矣  
其治莆田以循良稱後卒於吳

王禕

王禕字子充義烏人元季覩時政衰敝走燕都上書不報歸隱青岩山中太祖徵爲中書省掾進平江西頌上喜曰浙東有二儒卿與宋濂學問之博卿不如濂才思之雄濂不如卿詔修元史與濂同爲總裁官書成拜翰林待制奉使招吐蕃至蘭州召還改使雲南抗節死事具國史建文元年贈翰林學士謚文節正統中改謚忠文禕與陳基善嘗同遊吳松寓居頗久集中有吳江客中冬至日及吳江別蓮上人詩蓋

皆未遇時作也

李幹

李幹字貞臣睢州人仕元爲許州同知歷戶部侍郎  
佐擴廓軍後敗明兵俘置鎮江已而選入司農議禮  
律官制皆預焉及建六部以爲吏部郎中兼秦府相  
叅軍召議藩封復斥居寧夏又召入爲翰林待詔直  
閣以老致仕來蘇依友人盛遠居一都年八十六卒  
逮爲買地黃山葬之幹通究典章明國初制作論議  
英爽一時稱之

張明善

見同里先哲記

張明善博學多才長於詞曲古樂府歌行頃刻數百言立就得騷人比興之體善推步天象言休咎有徵元至正間從湖廣客遊東吳道阻不能歸因僑居同里巨室爭延致之方賓筵酒酣操筆爲新詞擊唾壺而歌聞者爲之傾倒清灑多疾遂卒